

ORIGEN FESTIVAL CULTURAL: program da stad 2020


Dalla tor aint igl casti

G.N.S. Aint igl focus digl program da chesta stad stat igl solt. Origen turna puspe a Riom cun las producziuns, lò noua tgi l'organisaziun culturala ò dimora siva da tschintg onns. Perveia dallas directivas digl coronavirus dattigl chesta stad nignas preschenta-ziuns ainten la tor cotschna sensom igl Gelgia.

Dei è sto intschert schi dat ansomma en program da stad digl Origen Festival Cultural. Giovanni Netzer, igl intendant dalla pi gronda occurrenza culturala digl Grischun ò detg agls Mulegns: «Las davosas emdas vainsa gia da far adegna puspe midadas tigl program, stritgier producziuns, ramplazzar preschenta-ziuns antras otras e tschartger novs lis da producziun». Siva da dumengia passada seia definitiv tgi Origen renunztga chesta stad da far diever dalla tor cotschna sensom igl Pass digl Gelgia.

Pigl bagn digls visitaders

I dat plessas raschungs persiva ò detg Giovanni Netzer. Da sa tigneir allas ordinaziuns perveia digl coronavirus fiss betg sto pussebel ainten la tor cun esser igl public fitg manevol agls protagonistas ed allas protagonistas dallas producziuns da solt, ballet e da cant. Er



Ainten la tor sensom igl Glegia dattigl en'exposiziun da costumes custevels.



Chesta stad davainta igl casti da Riom ena tgesa da ballet.

chegl tgi pertotga la logistica fissigl davanto ena veira sfida cun aveir da manar igls visitaders dallas producziuns cun autos da posta sen Gelgia. Er an chella tgossa fiss betg sto pussebel da sa tigneir allas distanzas perscretgas. Igl intendant d'Origen ò er detg tgi bliers visitaders digl festival totgan tar la gruppa da risc, uscheia tgi seia en'obligaziun da suandar allas directivas. Visitaders scu er tot las otras persungas involucadas aint igl program seia da schurmager. «Ia sa daveiras betg deir schi igl public vign ansomma an en schi grond domber scu igls davos onns».

En fatg plaschevel

Malgro las ordinaziuns e directivas perveia digl coronavirus dei Giovanni Netzer tgi i deta er bliers aspects positivs. El dei: «En fatg plaschevel è bagn tg'è pussebel da realisar igl antier program, schi er betg scu previa cunzont sensom igl Gelgia». Cugl casti da Riom ins vegia ena bunga alternativa tar la tor cotschna. Igl davos onns conferman tgi chel bietg istoric seia er adatto per producziuns da solt, tgi seian chesta stad igl feil cotschen digl program. Sa preschentar agl public vignan tranter oter ballerins e ballerinas dallas tgesas da ballet da Den Haag, Minca, Paris, St. Petersburg e per l'amprema geda er da Turitg. I dat gist ota premieras messas an solt digls pi ancunaschaints coreografs digl mond, aposta angal per Origen. An tot dattigl passa 120 preschenta-ziuns da solt, ballet, teater e cant. Tar tot las producziuns en figurar digl taimp medieval igl tema central, siva tgi igls davos dus onns è la Russia stada la tera

tg'ò inspira Giovanni Netzer da metter belas istorgias an pled e maletg.

Cant ainten la stalla

La gruppa cumedianta d'Origen vo chesta stad betg sen turnea, da vaseir è chella a Riom aint igl curtgign dalla Villa Carisch. An moda divertenta preschainta la gruppa anturn Fabrizio Pestilli l'istorgia digl imperator Carla igl grond. Alla curta vignan pero chesta stad er betg igls ameis digl cant, cumpeglia igl program er plessas producziuns interpretadas da solists e solistas digl Ensemble Origen. A Riom vign transformada ena stalla an ena gronda sala da concert, noua tg'è pussebel da tigneir aint las distanzas ordinadas perveia digl coronavirus. Las furmaziuns da cant vignan ad interpretar ovras romanticas, melanconicas, popularas, contemporanas e chegl da cumponists indigens e digl exteriour, cumponists tgi veivan anc u tg'en gio pi dei morts. Ainten la Clavadeira a Riom dattigl la dumang bod cant gregorian pigl «Laudes» tg'è siva digl 2005 ena part fixa digl program d'Origen.

Sen buna veia

Riom duess davantar chesta stat tigl center digl festival e retschever uscheia duple veta, ò accentuo Giovanni Netzer. Anc vegia el betg la rasposta digl cantun chegl tgi pertotga la lubientscha da lascher la tor cotschna sensom igl Pass digl Gelgia anfignen igl 2023. El seia dantant da buna speranza tgi igl cantun suonda alla dumonda digl cumegn da Surses e d'Origen.

MULEGNS: exposiziuns aint igl hotel Liun

Blers scazis èn nias notiers

G.N.S. En hotel cun en'istorgia da passa 150 onns so rachintar fitg bler. Gist tar egn da chels totga igl hotel Liun agls Mulegns. Siva da dus meis vign zavro tot chegl tg'ins catta davent digl spazzatga anfignen aint igl schler. Per part ins ò catto veir scazis tgi conferman tgi ainten chella tgesa geva aint ed or angal la «crème de la crème».

Passond igls davos dus meis igls Mulegns crudavan an igl las benas fullandas cun bler crom davant igl hotel Liun. En team fitg activ, sot la reschia da Florence Ursprung è ossa gio otg emdas vedlonder da far rughel aint igl hotel, tgi la Nova Fundaziun Origen ò savia cumprar graztga a bleras donaziuns da persungas privatas e da bleras fundaziuns ed organsaziuns tg'èn sa mussadas fitg generousas. La raschung tgi Giovanni Netzer ò surpiglia chella tgesa da passa 150 onns è tg'el vot mantigneir chel bietg istoric, dar ad el nova veta e la glischour tgi igl hotel Liun ò gia durant decennis.



En tgit ainten la tgombra noua tgi las bleras lampas èn exponeidas.

Gio pi dei ena collaboraziun fitg strètga

Per realisar chegl dovrigl blers idealists e tar egn da chels totga cunzont er Martin Leuthold, igl anteriour schef-designer dalla firma da textilias Schläpfer SA da Son Giagl. Ena tgesa da renom internaziunal, tgi produtgescha igls pi fegns urdens e la teila pi custavela per la «haute couture», scu per exaimpel «Chanel, Dior e Lagerfeld». Igl om digl rom ò en igl aparti per da tottas sorts motifs, motifs tg'el metta alloura an teila ed urden. Martin Leuthold cumplettescha las ideias da Giovanni Netzer, cun dar a protagonistis e protagonistas tg'èn sen tribuna vistgias d'urden fitg custevels, unics e singulars. Igl expert da moda è aint igl frataimp en grond amateur d'Origen. Ins dastga schizont deir tg'el veiva de e notg per chel festival cultural. Graztga agls vistgias da teila fegna on las produczziuns d'Origen retschet igls davos 15 onns ena noda anc pi extraordinara. Martin Leuthold vo fitg bagn a pêr betg angal cun Giovanni Netzer, mabagn er cun sia mamma Lucia Netzer-Peduzzi tg'ò cusia varsaquants vistgias per Origen cun teila dalla firma Schläpfer SA.

Inamuro aint igl hotel Liun

Per la realisaziun dallas exposiziuns da chesta stad aint igl hotel Liun segna er Martin Leuthold. El dei tgi cun far urden e zavrar tot chegl tg'ins vegia catto ainten l'antiera tgesa ins vegia catto bellezza tgossas. Sa musso seia tgi igls davos 150 onns seia nia cuverno tot e cunzont amplenja igl spazzatga cun roba pi pitschna e pi gronda, roba da valeta pero er

bler crom. Discorra Martin Leuthold digl hotel Liun vign alla gleisch tg'el è an veir senn inamuro ainten chella tgesa, tg'è intern en veir «bischu». Aint igl decurs da chest onn è previa da far la fatscheda, tgunsch pussebel an calour originala, en verdign pi discret.

D'ampas anfignen tarpungs

Chesta stad dattigl plessas exposiziuns publicas aint igl hotel Liun. La sala an stil floral survign en oter maletg graztga allas bleras pultrungas e numerous canapes tg'ins ò catto cun far rughel. Notiers èn alloura er nias mobels digl bung taimp digl hotel Liun scu per exaimpel cumodas, pults e spievels. Gist chels tradeschan bagn tgi la noblezza tgi pernottava aint igl hotel Liun, giound an Nagiadegna, pretendeva avant passa 100 onns ple tgi angal en spievel ainten la tgombra. Interessanta e da blera calour è l'exposiziun da tots models da lampas tg'ins ò scuvert aint igl bietg da passa 150 onns. Tarpungs custevels cun motifs singulars èn er exponias. Els servan a Martin Leuthold scu motifs per far tapetas per las tgombras e per far teila per vistgias per Origen. Schizont igls motifs digl urden dallas matrassas seian da betg gist mintga de, uscheia tg'el saptga duvrar els per far teila e cun chella igls pi bels vistgias, dei Martin Leuthold. Lino-leum era avant passa 100 onns en product da luxus e tgi custava fitg bler, dei igl om da son Giagl. Chegl è er igl muteiv tg'ins ò catto antieras rollas da linoleum cun motifs pi bels e manc bels. I vala an mintga cass da far en gir tras igl hotel e l'exposiziun tg'è publica a par-teir dall'antschatta da fanadour.



Martin Leuthold e la teila cuagl motiv digls geranis tgi Donata Willi, l'antierioura hoteliera ò tgiro scu igl pi grond scazi digl hotel Liun.